

Hendrik Adamsoni nimeline murdeluulevõistlus 2018  
Märgusõna LILLIORG

\*

Hindähe kaia om rassõ,  
ku kõva kest om pääl.  
Kergemp om tetä näko,  
et niimuudu ommgi hää.  
Kuis tuu prago sinnä  
kalõ kesta sisse saia?  
Kuis saas hirmu är võtta,  
ja uma henge sisse kaia?  
Lää mõttiga tagasi latsõpõlvõ,  
kos pallo viil võidse luuta.  
Haara nuu igätsüse üteh,  
et ello härksämbäs muuta.

\*

Hummoguhämäräst hõpõt,  
päävävalgusõst kulda  
vaos mu hiusside sisse  
ja varbide pääle kesk mulda.  
Morohain ku sammõt,  
ubinahäitsme ku lumi,  
nigu illos unõnägo  
sääl saisa ma õdakuni.  
Üle ola sa kaet iks perrä  
ja mõtlõt, kas jäiä vai minnä.  
Nii saisami terve päävä  
ja töösõst otsimi hinnäst.

\*

La olla mul täambä hirm,  
la olla viil tiidmäda tii.  
Käe karmanih muudku astu,  
suur usk minno edesi vii.  
Ma usu, et niisamma lihtsalt  
siin eloh ei midägi saa.  
Vaiv tulõ nätä ka tuuga,  
ku iihpuul om tasanõ maa.  
A ku lõpus tahat märke jõuda  
ja tunda sääl mäetipu tuult,  
üle kivve, läbi haina piät pressmä,  
tukõ saat mõnõlt ütsikult puult.  
Ütspäiv sõs jõvvatki märke üles,  
ku olõt pallo är raisanu väke,  
a tipuh es olõki elo nii illos,  
ku paistusi kaieh altpuult mäke.

\*

om nigu om  
om hallanõ süküs  
süämeh om külme  
ja lämmind ei saa  
om nigu om  
mu mõttihe tüküs  
pümme ilma vaiv  
nigu künneü maa  
om nigu om  
ku silmä kinni panda  
om valgust mu siih  
olõmises viländ viil  
om nigu om  
küll ma är jõvva kanda  
nika ao ku lumõpilve  
omma siia tiil

\*

Lumõmemm ja lumõtaat  
hoitva kinni käest.  
Näide mano lumõlatsi  
liuglõs alla mäest.  
Vasta päivä käändvä sälä,  
lämmistäse kunte,  
külmä põhjatuulõ vasta  
pääh nä kandva lunte.  
Lumõperre vastlapäiv  
kääümäh tävve huuga.  
Peräst süvväs ütitselt  
upõst tettüt ruuga.

### Joulumõtõ

Pümme aig saa poolõs,  
valgõmbas lätt päiv.  
Taivataadi hoolõs  
om võtta süämeest vaiv.  
Anda meile jõudu  
hoita hinnäst tiil,  
kos mi helge mõttõ  
usku andva viil.

\*

Musta ja valgõ omma klahvi,  
mis pillilõ andva õigõ helü.  
Musta ja valgõ omma päävä,  
mis vidävä meid läbi elo.  
Om vaihel vaia rassõmbat aigu,  
et hääst elost arvu saia.  
Ku hädäorost vällä spilõt,  
sõs mõistat hindä ümbre kaia.

\*

Ma tunnõ ja tiiä,  
sa kuulõt ja näet.  
Ma ooda vahtsõt ello,  
sa vanalõ perrä kaet.  
Mi kõgõ ku üü ja päiv,  
eräle mailmih käü elotii.  
Kõrras kokko ku saami,  
tsähväs pikne läbi silmävii.  
Ma olõ ku suvinõ päiv  
ja näe elo hellembät puult.  
Sa jäl üüse kuuga paarih,  
kuulõt õnnõ pümmet ja tuult.  
Kuis ma saassi su kätte üüst,  
vitä üteh valgusõ poolõ.  
Ku sa lasõssi vallalõ süüst,  
saassi ütte mi panda hoolõ.

\*

Uma kiil ja uma miil,  
uma mõttõ umah pääh.  
Imä kiil ja esä miil,  
latsõ kasvi tüüriist käeh.  
Umma maad ja umma tüüd  
kõgõst üle peeti.  
Aigu mano võeti üüst,  
ku hainu kodo veeti.  
Alalõ et jäässi kiil,  
unõhta ei tohi vaiva.  
Tüüga kimmäs jäi mi miil,  
kiäki sõs es kaiba.

\*

karmanipõhja  
om jäänü üts kivi  
mis kunagi  
kodokraavist leüdse  
tuu väiku tükk  
tege karmani rassõs  
a hengel om pallo kergemb

\*

Uhkõ nalli sattõva hiussist

su vanaimä ammu koetu pääväteki pääle.  
Mustõnu laepalk kaes mullõ kurjalt silmä.  
Kas ma ummi kapronsukkõ  
ja keemilidse tsäropäaga  
või sinno siin ümbrekaala hoita?  
Sa-i küsü tuust, et olõ liinast  
ni pelgä lehmä ja kiholaisi.  
Sa usut, et hirmust suurõmp om arm.  
Ma usu keväjädse vihma rammusat hõngu.  
Ma usu sinno.

Essünü

Pallõ puhmust, vast kiäki kuuld,  
küsü nõvvu ma tsirkõ käest,  
uika mõtsa sõs vasta tuult,  
looda api ma korgõmbast väest.  
Taivah kogonõs mustanõ pilv,  
undsõst nõsõs tsõõrinõ kuu  
ilmtahtmalda likõs lätt silm,  
ooda hummogut, targõmb om tuu.  
Nõsõs sõs päiv ja äkki ma näe,  
om eläjide tiirada haina siih,  
kaonu kodo paistus ümbre mäe,  
essünü om leüdnü kodotii.